

Headlines

- 1 उपराज्यपाल मनोज सिन्हा होरें मार्च दे पैहले हफ्ते च केंद्र शासित प्रदेश विधानसभा दे बजट सत्र दे शुरू होने दी मंजूरी दिती ऐ।
- 2 जंगलात ते पर्यावरण मंत्री जावेद अहमद राणा होरें हिमाचल प्रदेश दे मुख्मन्त्री हुंदे कन्नै मलाटी कीती ते पर्यावरण उप्पर केंद्रित सांझे हित दे मुद्दे उप्पर चर्चा कीती।
- 3 जम्मू डिविजन च आतंकवादी सरबन्धी नेटवर्क गी खत्म करने लेई तलाशी अभियान चलाए जा'रदे न।
- 4 उपमुख्मन्त्री सुरिंद्र चौधरी होरें राजौरी च जनता दरबार लोआइयै लोकें दियें दिक्कतें-परेशानियें ते विकास सरबन्धी मसलें बारै जानकारी हासल कीती।
- 5 जम्मू खित्ते च अज्ज थमां हल्की बरखा ते बर्फबारी दी मेद।

<><><><><><>

LG-Budget

जम्मू-कश्मीर विधानसभा दी सलाहकार कमेटी दी बैठक मेद ऐ जे फरवरी दे पैहले हफ्ते गी लग्गोग, जेदे च विधानसभा दे औंदे बजट इजलास दे कार्यक्रम गी मुकदा रूप दित्ता जागं बजट सत्र 3 मार्च गी शुरू होग। उपराज्यपाल मनोज सिन्हा होरें जम्मू-कश्मीर दी विधानसभा दे बजट इजलास गी लाने दी मंजूरी देई दिती दी ऐ। 20 जनवरी गी एल.जी मनोज सिन्हा हुंदी अध्यक्षता च लग्गी दी बैठक च बजट इजलास लाने बारै प्रस्ताव रक्खेआ गेआ जिसी मंजूरी थ्होई गेई। बजट इजलास 3 मार्च गी शुरू करने दा प्रस्ताव ऐ। एहू सत्र उपराज्यपाल हुंदे संबोधनै कन्नै शुरू होगं मुख्मन्त्री उमर अब्दुल्ला जिंदे कश खजाना मैहकमे दी जिम्मेदारी ऐ, ओहू बजट पेश करडन। एहू सत्र त्रै हफ्तें तगर होग।

<><><><><><>

Rana-Sukhu Meet

जल शक्ति, जंगलात ते पर्यावरण मैहकमे दे मंत्री जावेद अहमद राणा होरें हिमाचल प्रदेश दे मुखमंत्री सुखविंद्र सिंह हुंदे कन्नै नमीं दिल्ली च मलाटी कीती। बैठक दौरान उनें लोकहित कन्नै जुड़े दे मामलें पर चर्चा कीती। इस दौरान मंत्री जावेद राणा होरें कुदरती पानी दे संसाधनं दे संरक्षण ते उंदी हिफाजत करने दे अलावा ल्हास-पस्सियां पौने, मिट्टी दे कटाव गी रोकने लेई अपनाई जा'रदी रणनीतिएं ते तौर-तरीकें पर बी चर्चा कीती की जे जम्मू-कश्मीर ते हिमाचल प्रदेश दे पर्यावरण सरबन्धी मसले लगभग इक्के नेहू न। दौनें नेताएं कुदरती संसाधनं दे रख-रखाव, उन्दे संरक्षण ते कुदरती तवाजम गी बनाई रखने बारै अपने विचार सांझा कीते।

<><><><><><>

Search-Operation

जम्मू-कश्मीर पुलस, फौज ते नीम फौजी बलें जम्मू प्रांतै दे केई सारी थाहरें पर आतंकवाद रोधी अभियानें गी तेज करी दित्ता गेआ ऐ। एहदे च मुख तौरा पर कब्जा रेखा ते जंगली इलाके शामिल न। इनें अभियानें दा मकसद 2024 च होए दे आतंकी हमले लेई जिम्मेदार पूरे-पराते आतंकवादी नेटवर्क गी खत्म करना ऐ। इनें आतंकवादी हमलें च 18 सुरक्षा शहीद ते 14 आम नागरिकें सने 44 लोकें दी जान गेई ऐ। इस दौरान आतंकवादिएं दी छप्पने आहली थाहरें दा पता लाइए उसी नष्ट करने, खास करी जंगली इलाकें च बनाई गेदी नेई थाहरें गी तबाह करने पर ऐ।

<><><><><><>

Raid

तोआई, जम्मू-कश्मीर पुलस ते सी.आर.पी.एफ. दे कर्मिएं आसेआ अज्ज राजौरी दी केई सारी थाहरें पर छापेमारी कीती गेई। एहू छापेमारी कब्जा रेखा दे उस भेठा थ्वां आतंकवादी गतिविधियां चलाने आहलें दे खिलाफ कीती जा'रदी ऐ। इस दौरान उनें संदिग्ध लोकें दी संपत्तिएं पर छापेमारी कीती जा'रदी ऐ जिंदा आतंकवादी नेटवर्क कन्नै संपर्क होने दा शक ऐ। हाल दे म्हीने च केई सारी थाहरें पर छापेमारी कीती गेई ऐ। होर ब्यौरे गी अजें बलगेआ जा'रदा ऐ।

<><><><><><>

Anti Drug Rally Reasi

केंद्री संचार ब्यूरो ते जम्मू-कश्मीर पुलस आसेआ रियासी च नशा रोधी रैली ते जागरूकता कैंप दा सरिस्ता कीता गेआ। एहदा मकसद नशीले पदार्थें दे सेवन करी होने आहले नुकसान बारै लोकेँ गी जानकार बनाना हा तां जे नशामुक्त समाज गी बढावा दित्ता जाई सकै। एह रैली रियासी दी नमी बस्ती थ्वां शुरू होई ते मुख-मुख थाहरें थ्वां होंदे होई लंग्घी। एहदे च विद्यार्थिं, युवां, समुदायिक नेतां, कनून नाफिज करोआने आहले अफसरें हिस्सा लैता।

<><><><><><>

Dy.CM

उप मुखमंत्री सुरिंद्र चौधरी होरें राजौरी दे पुनना खेत्तर कांगड़ी च इक्क जनता दरबार लोआया ते लोकेँ दियें दिक्कतें-परेशानियें गी सुनेआ। इस दौरान लोकेँ उनेंगी शिड़क, पानी, बिजली, सेहत-सहूलतें ते इयै जेह होर दुए लाजमी मसलें बारै दस्सेआं उप-मुखमंत्री होरें जिला प्रशासन गी लोकेँ दी जायज मंगें गी मरहलेवार ढंगै सिर हल करने दे निर्देश दित्ते ते आखेआ जे सरकार नै लोकेँ दे कल्याण दी पक्क ध्याइ, दी ऐ। चौधरी होरें प्रशासन गी बन्ने कन्नै लगदे इलाकेँ दे लोकेँ तगर पुज्जत बनाने लेई बक्ख-बक्ख प्रोग्राम करने दे बी निर्देश जारी कीते।

<><><><><><>

Badhaal

बडहाल ग्रां दे बसनीकेँ गी जागतें दे हायर सेकेंडरी स्कूल च रिहायश दी सुविधा दित्ती गेदी ऐ ते इस गल्ला लेई लोकेँ दिलै थमां प्रशासन दा सहयोग देने लेई आभार प्रगट कीता ऐ। मकामी प्रशासन, डीसी राजौरी ते होर दुइयां एजेंसियां बडहाल ग्रां थमां आए दे लोकेँ गी रिहायश थाहर शिक्षा ते सेहत सहूलतें सने होर दुइयां सुविधा देने दे पूरे यत्न करा'रदे न। उन्दे प्रति अपना आभार प्रगट करदे होठ बडहाल ग्रां दे इक बसनीक नै आखेआ।

<><><><><><>

National-Games

उत्तराखंड च कल थमां शुरू होई दी 38मीं राश्ट्रीय खेड्डें च मार्शल आर्ट्स, निशानेबाजी, खो-खो सने होर दुइयां खेड्डें दा प्रदर्शन कीता जाग। देश दे बक्ख-बक्ख हिस्सें थमां खडारी वुशु, राइफल, निशानेबाजी, बैडमिंटन, बास्केटबॉल ते पानी च खेड्डे जाने आहलियें बक्ख-बक्ख खेड्डें च हिस्सा लै रदे न। जम्मू-कश्मीर थमां 108 एथलीट 14 बक्ख-बक्ख खेड्डे स्पर्धाएं जिंदे च वुशु, निशानेबाजी, कुश्ती ते होर दुए मुकाबलेबाजी च अपने हुनर दा प्रदर्शन करडन। एहू खेड्डे प्रतियोगिता खडारियें गी अपने हुनर दा प्रदर्शन करने लेई इक मंच प्रदान करा'रदियां न। होर दुए मुकाबलेबाजी च अपने हुनर दा प्रदर्शन करंगन। एहू खेड्डे प्रतियोगिता खडारियें गी अपने हुनर दा प्रदर्शन करने लेई इक मंच प्रदान करदियां न। उत्तराखंड च चला रदे इनें राश्ट्रीय खेड्डें च पुरूशें दे इक्कले ट्रायथलान च मणिपुर दे सरगमबाम अथौबा मेई तेई होरें सुन्ने दा ते तेल हेइबा सोरम होरें कैहू दा तगमा जित्तेआ।

<><><><><><>

Winter-Fest Doda

सैलसफा ते मुकामी संस्कृति गी बढ़ावा देने दे मकसद कन्नै 2 फरवरी गी डोडा दी मशहूर सैलानी थाहर लाल द्रमण च विंटर फेस्टिवल दा सरिसता कीता जाग। एहदा आयोजन तेजस एक पहल फाउंडेशन आसेआ जिला प्रशासन ते सैलसफा मैहकमे कन्नै रलिए कीता जा'रदा ऐ। एहदा मकसद मकामी अर्थ बवस्था गी बढ़ावा देना ते मकामी कलाकारें गी इक मंच प्रदान करना बी ऐ। चेररमैन आकाश परिहार होरें आखेआ जे इस उत्सव दौरान खेड्डे प्रतियोगिता, जागरूकता स्टाल ते सांस्कृतिक गतिविधिएं दा सरिस्ता कीता जाग। एहदे राएं लाल द्रमण गी सैलानी नक्शे पर आहनने च मदद थ्होग।

<><><><><><>

Weather

जम्मू-कश्मीर च अज्जै थमां बक्ख-बक्ख थाहें उप्पर बरखा ते बर्फबारी दी मेद ऐ। मौसम विभाग नै अज्ज रातीं ते कल बडुलै बी केई सारी थाहें उप्पर हौली बरखा बरने ते बर्फबारी दे असार जताए न। एह्दे परैन्त औंदी पहली फरवरी दी रातीं ते 2 तरीक गी बी दरम्याने ते उच्चे प्हाड़ी इलाकें च दरम्याने दर्जे दी बर्फबारी दी पेशगोई कीती गेई ऐ। तोआई जम्मू-श्रीनगर राश्ट्री जरनैली सिडक एनएच-44 पर गड्डिएं दी आओजाई दौनें बक्खी दा बवस्थित ढंगै'नै होआ करदी ऐ। ऊआं लोकें गी एहू सलाहू बी दित्ती गेदी ऐ जे ओहू अपनी लेन च पूरे अनुशासन कन्नै गड्डी चलान ते दिनै बेल्लै सफर गी मती तरजीहू देन। तोआई जम्मू खित्ते दे रजौरी ते पुंछ जिले गी कश्मीर घाटी दे शोपियां जिले कन्नै जोड़ने आहली ऐतिहासिक मुगल रोड अजे बी गड्डिएं दी आओजाई लेई बंद ऐ।

<><><><><><>